

Na osnovu člana 75. a u vezi sa članom 240. i članom 286. stav (2) Statuta Univerziteta u Tuzli, Senat Univerziteta u Tuzli na sjednici održanoj 11.06.2014. godine utvrdio je

**PRAVILNIK**  
**o načinu vrednovanja kriterija u postupku izbora i zasnivanja radnog odnosa**  
**asistenata i viših asistenata na Univerzitetu u Tuzli**  
**(Prečišćeni tekst)**

Član 1.

Ovim Pravilnikom utvrđuje se način vrednovanja kriterija i druga pitanja u postupku izbora i zasnivanja radnog odnosa asistenata i viših asistenata na Univerzitetu u Tuzli (dalje: Univerzitet).

Član 2.

U slučaju kada se na javni konkurs za izbor u saradničko zvanje prijavi više lica koja ispunjavaju uslove za izbor u zvanje asistenta ili višeg asistenta, utvrđenih Zakonom o visokom obrazovanju i Statutom Univerziteta, stručna komisija za pripremanje prijedloga za izbor i naučno-nastavno/Umjetničko-nastavno vijeće fakulteta/Akademije, vrši rangiranje kandidata i utvrđuje prijedlog za izbor vrednovanjem kriterija iz člana 240. Statuta Univerziteta.

Kada se na raspisani konkurs, kojim se vrši izbor i zasnivanje radnog odnosa prijave (kandidati koji imaju validan izbor u saradničko zvanje na Univerzitetu na odgovarajućoj užoj naučnoj/umjetničkoj oblasti/predmetu, imenovanoj komisiji će se iz matične evidencije kadrovske službe staviti na raspolaganje: izvještaj stručne komisije, te dokazi o ispunjavanju uslova za izbor u odgovarajuće zvanje kao što su diploma, uvjerenje o ostvarenoj prosječnoj ocjeni u toku studija/uvjerenje o položenim ispitima.

Za slučaj iz prethodnog stava, izabrani kandidati uz prijavu na konkurs obavezno dostavljaju: odluku Senata o izboru u zvanje, biografiju, kao i druge dokaze po kriterijima na osnovu kojih se vrši rangiranje kandidata, a koje su izabrani kandidati stekli nakon izbora u zvanje.

Član 3.

Kandidatima čije su prijave na konkurs za izbor u zvanje blagovremene i potpune i koji ispunjavaju propisane uslove za izbor, vrednuju se samo kriteriji za koje su kandidati pružili odgovarajuće dokaze.

Član 4.

(1) Vrednovanje utvrđenih kriterija izražava se u bodovima.

(2) **Kriteriji za izbor u zvanje asistenta vrednuju se na način kako slijedi:**

- **visina ukupne prosječne ocjene** ostvarene na dodiplomskom/prvom ciklusu studija vrednuje se maksimalno sa 30 bodova, a izračunava se tako što se ukupno ostvarena ocjena u toku studija množi sa 3 i zaokružuje se na dvije decimale;
- **visina prosječne ocjene iz predmeta uže naučne/umjetničke oblasti/nastavnog predmeta** na koju se kandidat bira vrednuje se maksimalno sa 30 bodova, a izračunava se tako što se ostvarena ocjena pomnoži sa 3 i zaokružuje se na dvije decimale;  
Kandidat za asistenta može biti izabran ukoliko je ostvario minimum 50% ECTS bodova uže naučne/umjetničke oblasti, studijskog programa na koji se bira na matičnom fakultetu;
- **dužina studiranja** vrednuje se sa 5 bodova kandidatu koji je studij završio u roku, Ukoliko je kandidat završio studij u apsolventskom roku, boduje se sa 3 boda;  
Pod završetkom studija u roku podrazumijeva se završetak studija prije početka apsolventskog roka za tu generaciju;
- **pokazan smisao za istraživački rad** vrednuje se tako da prvom kandidatu koji ima objavljene radove daje prednost u odnosu na drugog kandidata s istim brojem bodova;

- **poznavanje rada na računaru**, boduje se sa 1 bodom;
- **poznavanje jednog svjetskog jezika, najmanje srednjeg nivoa**, boduje se sa 1 bodom;
- **Učešće u nastavnom procesu na Univerzitetu izabranog saradnika-asistenta na užoj naučnoj/umjetničkoj oblasti na koju se vrši izbor**, vrednuje se sa 2 boda po semestru;
- **kandidat, „Zlatni student“/“Student generacije“ Univerziteta**, boduje se sa 5 bodova.

**(3) Kriteriji za izbor u zvanje višeg asistenta vrednuju se na način kako slijedi:**

- kandidat koji prije izbora u zvanje višeg asistenta nema iskustvo u nastavnom radu u visokoškolskoj ustanovi, može biti izabran u zvanje višeg asistenta ukoliko pored ostalih uslova propisanih za izbor u zvanje višeg asistenta, ispunjava i uslove za izbor u zvanje asistenta;
- **visina prosječne ocjene ostvarene na odgovarajućem postdiplomskom/drugom ciklusu studija, odnosno na integriranom I i II ciklusu studija za studente medicine i farmacije po Bolonjskom procesu** vrednuje se maksimalno sa 30 bodova, a izračunava se tako što se ostvarena prosječna ocjena pomnoži sa 3 i zaokružuje se na dvije decimale;
- **broj objavljenih naučnih i stručnih radova** vrjednuje se kako slijedi:
  - svaki objavljeni naučni rad iz uže naučne/umjetničke oblasti na koju se bira vrednuje se sa 5 (pet) bodova;
  - svaki objavljeni stručni rad iz uže naučne/umjetničke oblasti izbora vrednuje se sa 3 boda;
 Broj ostvarenih bodova po ovom kriteriju može iznositi najviše 30;
- **pokazana sklonost za nastavni i naučno/umjetničko-istraživački rad** vrjednuje se kako slijedi:
  - učešće u nastavnom procesu asistenta i višeg asistenta na odgovarajućoj užoj/naučnoj/umjetničkoj oblasti na Univerzitetu vrednuje se sa 2 boda po semestru;
- **učesće u radu na naučno/umjetničko-istraživačkim projektima** vrjednuje se sa 5 bodova po projektu iz naučne/umjetničke oblasti izbora, pri čemu se po ovom osnovu može ostvariti najviše 10 bodova.

**Član 5.**

Kriteriji iz člana 4. ovog Pravilnika primjenju se i u postupku izbora asistenata i viših asistenata bez zasnivanja radnog odnosa.

**Član 6.**

(1) U postupku po raspisanom konkursu kojim se vrši i zasnivanje radnog odnosa vrednuje se i kriterij: „pripadnost borcima/braniteljima i članovima njihovih porodica/obitelji“ po slijedećem redoslijedu:

1. član porodice šehida, poginulog, umrlog i nestalog borca/branitelja ..... 5,0 bodova
2. ratni vojni invalid :
  - invalid od 80 % do 100 % invaliditeta ..... 4,5 bodova
  - invalid od 50 % do 70% invaliditeta ..... 4,3 boda
  - invalid od 20 % do 40 % invaliditeta ..... 4,0 bodova,
 pri čemu se grupe invaliditeta utvrđuju u skladu sa federalnim Zakonom o pravima branilaca i članova njihovih porodica,
3. dobitnik ratnog priznanja i odlikovanja ..... 3,0 boda
4. demobilisani borac/branitelj:

- učešće u oružanim snagama preko 4 godine .....2,5 bodova
  - učešće u oružanim snagama od 2 do 4 godine ..... 2,4 boda
  - učešće u oružanim snagama od 1 do 2 godine ..... 2,3 boda
5. član porodice/obitelji ratnog vojnog invalida, dobitnika ratnog priznanja i odlikovanja i demobilisanog borca/branitelja (50% bodova od tačke 2,3, i 4. ovog stava).

(2) Kriterij iz prethodnog stava ovog člana primjenjuje se na kandidate koji pripadaju licima iz člana 1. i 4. Zakona o dopunskim pravima branitelja i članovima njihovih porodica („Službene novine TK“ broj: 5/12 i 5/14) i koji ispunjavaju propisane uslove za izbor, a imaju status nezaposlenog lica na evidenciji Službe za zapošljavanje, bez obzira na starosnu dob.

(3) Kriterij iz stava 1. ovog člana ne primjenjuje se na kandidate iz prethodnog stava ovog člana kojima je radni odnos prestao njihovom krivicom ili su po prestanku radnog odnosa ostvarili pravo na otpremninu, odnosno koji su korisnici prava na porodičnu penziju.

(4) Kandidatima koji ispunjavaju uslove po više podkriterija iz stava 1. ovog člana vrednovat će se samo podkriterij koji nosi najveći broj bodova“.

(5) Vrednovanje ovog kriterija vrši se samo uz pružen dokaz izdat od nadležnog organa/službe o pripadnosti odgovarajućoj kategoriji.

#### Član 7.

Odredba člana 4. stav 3. alineja 1. i odredba člana 6. ovog Pravilnika primjenjivat će se nakon stupanja na snagu Odluke o izmjenama i dopunama Statuta Univerziteta u Tuzli(Prečišćeni tekst) broj: 03-821-3/14 od 12.02.2014. godine i broj: 03-2452-1/14 od 21.04.2014. godine.

#### Član 8.

Ovaj pravilnik stupa na snagu danom donošenja.

UNIVERZITET U TUZLI  
S E N A T

Broj: 03-3540-4/14

Tuzla, 11.06.2014. godine

PREDSJEDNIK SENATA

Dr.sc. Enver Halilović, redovni profesor